

NAQQIISSUT

Taamaallaat saqqummiussisutip qulequtaa inatsisissatut siunnersuummut naapertuuttunngorlugu allannguuteqarpoq.

Uunga siunnersuut: Umiarsualiviit pillugit Inatsisartut inatsisaat nr. xx, xx. xxxxx 2015-imeersoq.

(Ineqarnermut, Sanaartornermut Attaveqaqatigiinnermullu Naalakkersuisoq)

Saqqummiussisut

(Ineqarnermut, Sanaartornermut Attaveqaqatigiinnermullu Naalakkersuisoq)

Siullermeerneqarnera

Umiarsualiviit pillugit Inatsisartut inatsisissaata Inatsisartunit aalajangiiffigineqarnissaa pillugu siunnersuutip umiarsualiviit pillugit inatsisit maanna piusut taarsissavai.

Inatsisissatut siunnersuummi siunertaavoq umiarsualiveqarfiit Namminersorlutik Oqartussanit pigineqartut inuiaqatigiinni attaveqaateqarnermilu illoqarfinni nunaqarfinnilu pisariaqartitat siunissaq isigalugu qulakkeerneqarnissaat, tamakkulu tasaanerupput usinik tigooraaneq nassiussuinerlu, aalisarnermik inuussutissarsiuteqartut sullinneqarnerat kiisalu umiarsuartigut ilaasunik angallassisut sullinneqarnerat. Umiarsualiviit tamakku pisortanit ingerlanneqartut siunissamittaaq aningaasanut inatsisikkut aningaasalersorneqassapput.

Siunnersuummittaqq inuinnaat, inuussutissarsiortut kiisalu kommunini oqartussaasut umiarsualivinnik ingerlatseqatigiiffiliornikkut umiarsualiveqarfiliorsinnaanermut periarfissinneqarput. Tamanna isumaqarpiarpoq Namminersorlutik Oqartussat Qeqqata Kommunalu nammineq akilikkaminik nutaamik talittarfiliornera pillugu isumaqatigiissusiorsinnaanerannut sinaakutissat maanna inissinneqarmata.

Aammattaaq namminersortut pisortallu ingerlataannik umiarsualivinnik ingerlatsinermut atuisut akiliuteqartarnissaat tunngavissinneqarpoq. Atuisut akiliutissaata annertussusissaa umiarsualiveqarfiit namminersortunit pisortanilluunniit ingerlanneqartuuppata, nalunaarummi ersarinnerusummik aalajangersaanikkut aalajangerneqassaaq.

Atuisut akiliuteqartarnissaat pingaarnertut aningaasalersuisussat eqqarsaataangilaq, umiarsualiviulli ingerlanneqarneranut aningaasalersuinerlutik tapertaassalluni. Pingaarpoq atuisut akiliuteqartinneqartarnerisa unammilleqatigiinnermik equititsinnginnissaa, taamaattumik akigititat tamarluinnaasa Naalakkersuisunit akuersissutigineqartassapput.

Kiisalu siunnersuutigineqarpoq umiarsualiveqarfiit piusut kommuninit ingerlanneqartut maleruagassat Naalakkersuisunit aalajangersarneqartut naapertorlugit ingerlaannassasut.

Tamatumani tungaviussaaq umiarsualiviit pineqartut siunissami ingerlanneqarnissaannut, ingerlatsinerup, akigitat il.il. ersarinnerusumik aalajangersarneqarneri ilanngullugit Naalakkersuisut akuersissutinik tunniussaqaarnissaat.

Isumaqarluinnarpunga taamaattumik inatsisissatut siunnersuuteqarnikkut umiarsualiveqarnerup ineriartornera taperseripput. Taamatuttaaq naatsorsuutigaara umiarsualivinnut pilersaarutini maannakkorpiaq suliarineqartuni ersersinneqarumaartoq. Pingaarpoq sakkussat eqqortut pigilernissaat, umiarsualiviit ineriartortinniassagatsigik, inuiaqatigiinnullu iluaqutaasumik imminut akilersinnaanerusuni nukissanik atuisinnaaniassagatta.

Taamatut oqaaseqarlunga siunnersuut Inatsisartunit oqallisigilluarneqarnissaanut tunniuppara.